



# mjesečni Bilten

omladinska mreža bosne i hercegovine

juni  
lipanj  
2017.

217

## Dragi prijatelji/ce,

Predstavljamo vam **junsko** izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **182** organizacije i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

[www.omladina-bih.net](http://www.omladina-bih.net)



### SADRŽAJ

Aktivnosti u junu 2017.....	2
Planovi za juli 2017. ....	7
Aktivnosti članova mreže .....	8
Saopštenja/informacije/donatori/pozivi .....	18

Uživajte u čitanju!

# AKTIVNOSTI ORC/HCA U JUNU 2017.



## Anna Lindh Fondacija Bosanskohercegovačka mreža

### Održan deveti godišnji sastanak ALF mreže u BiH

U Tuzli je, periodu od 9. do 10. juna održan deveti godišnji sastanak članica ALF mreže Bosne i Hercegovine. Sastanku u Tuzli je prisustvovalo 20 predstavnika iz 17 organizacija članica ALF Mreže BiH, te jedne organizacije koja nije članica (**Balkan Diskurs Sarajevo**). Sastanak je bio prilika da članice mreže razgovaraju o aktivnostima ALF BiH u proteklom periodu, upoznaju se sa ALF projektom „Learning indeed“, koji realizuje Omladinski klub Pod istim suncem Jablanica, Informišu o pokrenutoj peticiji za Concert Hall Sarajevo i Muzej mira i kulture, koju realizira IPC Sarajevska zima Sarajevo (**ukoliko želite da se pridružite i potpišete peticiju, tekst peticije se nalazi na kraju biltena – u rubrici “informacije”**), upoznaju o narednim koracima i aktivnostima ALF BiH i ALF međunarodne mreže, te rade na izradi SWOT analize mreže i kratkoročnim strateškim ciljevima i pravcima mreže.



U okviru sastanka održan je i sastanak **Upravnog odbora mreže**. Neki od zaključaka sa sastanka Odbora bili su:

Pokretanje inicijative za osnivanje ALF mreže u Srbiji, i njeno priključivanje ALF;

Usvojen je izvještaj o radu glavne kancelarije mreže u proteklom periodu, kao i plan rada ALF za period do kraja 2017. godine u okviru kojega će se odvijati i aktivnosti ALF Mreže BiH;

Zauzet je i zvanični stav UO ALF Mreže BiH da se u budućoj selekciji predstavnika iz BiH za međunarodno predstavljanje ALF članica iz BiH obavezno uzme u obzir i preporuka Glavne kancelarije ALF BiH, što do sada nije bio slučaj;

Usvojena je inicijativa o osnivanju „Savjeta za saradnju i međunarodnu saradnju“ ALF BiH, koji bi brojao 5-7 članova, starijih od 45 godina, sa zastupljenošću oba pola, sa zastupljenošću svih dijelova BiH. Članovi Savjeta mreže bi u narednom periodu svojim ugledom i kontaktima pomogli razvoju ALF mreže BiH;

Odlučeno je da se ALF BiH mreža ubuduće prijavljuje na otvorene pozive i drugih donatora koji podržavaju rad i izgradnju kapaciteta mreža organizacija civilnog društva;

Usvojena je inicijativa o konačnom uspostavljanju saradnje sa nadležnim BiH ministarstvom (Ministarstvo vanjskih poslova BiH), kako bi ALF mreža BiH dobila institucionalnog partera u BiH;

Usvojen je prijedlog da se članice iz BiH koje su učestvovalе kao partneri na projektima drugih ALF mreže pozovu u članstvo ALF Mreže BiH;

Više informacija, kao i sve izvještaje možete pronaći na: [www.omladina-bih.net](http://www.omladina-bih.net) i <http://www.annalindhoundation.org/networks/bosnia-and-herzegovina>



## Osnovano Vijeće mladih Tuzle



U Međunarodnoj galeriji portreta Tuzla 2. Juna održana je osnivačka skupština Vijeća mladih grada Tuzla, kojoj su prisustvovali članovi 14 tuzlanskih omladinskih organizacija koje su, nakon višemjesečnog procesa, uspjele osnovati jedinstveno zajedničko tijelo – Vijeće mladih. Događaju su prisustvovali predstavnici Grada Tuzla, na čelu sa gradonačelnikom Jasminom Imamovićem, predstavnici drugih organizacija, kao i zainteresovani građani.

Na osnivačkoj skupštini izabrana je predsjednica Vijeća mladih **Asja Dizdarević** i njen zamjenik **Amar Kalajlić**. U upravnom odboru ORC Tuzla će predstavljati **Slobodan Blagovčanin**.

Vijeće mladih grada Tuzla trenutno čine predstavnici omladinskih udruženja: „Mladi Tuzle“; „Multi“; „Ekosol“; „Medicus“; „akustikUM“; Omladinski pokret „Revolt“; Civilna, edukativna i transparentna platforma; KUD „Pasci“; Odred izviđača „Krin“; Pozorište mladih Tuzla; Tuzlanski otvoreni centar; Omladinski resursni centar, Klub borilačkih sportova „Tuzla-Sinbra“ i Organizacija za djecu i mlade „Osmijeh za Osmijeh“

## „Tolerantni gulaš“

U Nedjelju, 17. juna je u tuzlanskom prigradskom naselju Požarnica održana tradicionalna manifestacija "Tolerantni gulaš". Tolerantni gulaš organizuje udruženje mladih „Obnova“ Požarnica, a cilj je povezivanje ljudi, predstavnika organizacija zajedničko druženje i razmjenjivanje poznanstava i kontakata.

Posebnu draž ovoj manifestaciji daje činjenica da je Požarnica povratničko naselje u kojem su prije rata pretežno živjeli Srbi, tako da tolerantni gulaš ujedno predstavlja i poveznicu koja omogućava promociju suživota između Bošnjaka, Srba, i Hrvata koji su se odazvali ovom druženju.

Svoje učešće u pravljenju gulaša u Požarnici uzeo je i Omladinski Resursni Centar Tuzla, sa predstavnicima: Mirela Biković, Adi Selman i Miralem Tursinović, koji su - po mišljenju mnogih, a uz vođstvo **Leile Selimović**, napravili najukusniji gulaš na ovim susretima.



## Učešće na radionici u Brčkom

**Kako osnažiti bh kapacitete za zaštitu i praćenje stanja ljudskih prava u BiH i udružiti napore u pružanju podataka o stvarnom stanju na terenu, uz snažnu ulogu medija i javnosti**



U Brčkom je 13. Juna održana radionica organizacija civilnog društva i medija, u organizaciji EU SOCEM projekta i Ministarstva za ljudska prava i izbjeglice BiH. Radionica je organizovana u cilju uspostavljanja bolje saradnje između institucija i civilnog sektora, sa posebnim fokusom na saradnju u praćenju stanja ljudskih prava u BiH.

Na radionici je predstavljena baza podataka o predmetima diskriminacije i podaci potrebni za praćenje stanja

ljudskih prava u našoj državi. Ispred ORC Tuzla radionici su prisustvovali Miralem Tursinović i Slobodan Blagovčanin.

## Učešće na konferenciji u Tuzli

### Konferencija „Nasilje i zlostavljanje putem informaciono - komunikacijskih tehnologija - dobno prikladni nastavni plan i program za osnovne i srednje škole u Tuzlanskom kantonu“

S ciljem stvaranja sigurnog virtuelnog okruženja za djecu, organizacija Save the Children pokrenula je projekat „**Sigurni i spojeni u susretu i virtuelnoj sredini koja je sigurna za djecu**“, a koji se provodi u BiH i Srbiji. U sklopu ovoga projekta 21. juna u Tuzli održana je i konferencija „Nasilje i zlostavljanje putem informaciono-komunikacijskih tehnologija - dobno prikladni nastavni plan i program za osnovne i srednje škole u Tuzlanskom kantonu“. Na ovoj konferenciji su prezentirani rezultati višemjesečnog rada u Tuzlanskom kantonu, gdje je u 10 osnovnih i srednjih škola pilotiran dobno prikladan nastavni plan i program, koji obuhvata i teme koje se tiču sigurnosti na internetu. Ovaj projekat je započet prošle godine u Tuzlanskom kantonu, a realizuju ga Pedagoški zavod, Ministarstvo za obrazovanje, nauku, kulturu i sport i Ministarstvo unutrašnjih poslova Tuzlanskog kantona, uz podršku organizacije Save the Children.

Predstavnice Omladinskog resursnog centra Tuzla na ovoj konferenciji bile su Ivana Jokić i Merita Sokoli.



## Obnavljanje kulture mira - panel

Panel diskusija pod nazivom „Obnavljanje kulture mira“ održana je u hotelu Holiday u Sarajevu, 22. Juna. Na panel diskusiji, koju je organizovala organizacija posvećena miru i stabilnosti u BiH i regiji „Centar za postkonfliktna istraživanja“ (Post-conflict research center) Sarajevo učestvovali su predstavnici nevladinih organizacija i građani, koji su razgovarali o izgradnji mira u prethodnih 20 godina u Bosni i Hercegovini.



Panel diskusija je realizovana uz pomoć Međunarodnog krivičnog tribunala za Bivšu Jugoslaviju, a jedan od govornika na panelu bio je i predstavnik ORC Tuzla – Slobodan Blagovčanin.

## Prezentacija YES – programa za mlade



U četvrtak 22. Juna, u prostorijama SOS Dječijih sela Tuzla, održana je se prezentacija rada „YES“ Centra – SOS Dječija sela BiH. Cilj ove prezentacije bio je upoznavanje „YES“ Centra i menadžmenta same organizacije sa omladinskim organizacijama koje djeluju u Tuzli, koje su pritom članice Vijeća mladih Grada Tuzle.

„YES“ Centar je ponudio svim organizacijama partnersku saradnju prilikom implementacije programa ili projekata, kako bi zajedničkim snagama poboljšali uslove života mladih osoba. Tom prilikom su istakli da su njihova ciljna grupa mladi pod rizikom.

Pored ostalih omladinskih organizacija iz Tuzle, i Omladinski resursni centar Tuzla je uzeo učešće na ovoj prezentaciji, a predstavnica je bila Mirela Biković. Više o YES programu za mlade možete pronaći na kraju ovog biltena – u rubrici „Saopštenja, informacije, pozivi, donatori“

## Omladinska grupa ORC Tuzla

### YOUTH 4 better future

Omladinska grupa i ORC Tuzla sa zadovoljstvom vas obavještavaju da je projektni grant „Mladi za bolju budućnost“ odobren od strane Ambasade Sjedinjenih Američkih Država u Bosni i Hercegovini.

Projekat će se realizovati u 4 grada u Bosni i Hercegovini (Vitez, Brčko, Doboj i Tuzla), i na njegovoj realizaciji će biti uključene samo mlade osobe. Cilj projekta je da se, kroz tehnike Forum teatra sa mladima, radi na suzbijanju diskriminacije, da se upoznaju sa terminima poput stereotipa, identiteta, ljudskih prava i vršnjačke edukacije.

Također, tokom realizacije projekta snimaće se i dva video uratka. Jedan video uradak će biti promotivnog tipa i najaviti projektne aktivnosti, dok drugi će biti dokumentarnog karaktera.

Projekat sa realizacijom kreće u mjesecu septembru tekuće godine.

### Trening – Vizije omladinskog rada



U Vršcu je od 9. do 15. juna održan trening kurs za vizualizaciju, pod nazivom „Vizije omladinskog rada“. Trening kurs „Vizije omladinskog rada“ je prvi od dva treninga koji se realizuju za omladinske radnike i aktiviste iz Srbije, BiH, Slovenije, Turske i Grčke.

Cilj projekta, koji se realizuje pod pokroviteljstvom Evropske Komisije kroz program Erasmus+, jeste jačanje kapaciteta omladinskih organizacija za uključivanje okoline u omladinski rad kroz digitalnu komunikaciju i korištenje vizualnih poruka.

Organizator treninga, organizacija iz Srbije „BUM“ zakazala je slijedeći trening u septembru na Halkidikiju. Predstavnik Omladinske grupe ORC Tuzla bio je Emir Karamujić.

## Redovne aktivnosti ORC i hCa Tuzla:

Tokom juna radili smo na održavanju i razvoju komunikacija i koordinacije unutar Omladinske mreže Bosne i Hercegovine ([www.omladina-bih.net](http://www.omladina-bih.net)). U okviru toga smo svakodnevno na mejling listu mreže ([posta@omladina-bih.net](mailto:posta@omladina-bih.net)), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH.

## PLANOVI HCA/ORC-A ZA JULI 2017.

- Sprovođenje redovnih aktivnosti kroz Omladinsku mrežu BiH;
- Aktivno učešće u međunarodnoj ALF mreži, održavanje i logistička podrška ALF Mreži Bosne i Hercegovine – selekcija učesnika iz ALF BiH za učešće u međumrežnim aktivnostima u projektima: Kīmiyya - Women Actresses of Dialogue (**Napulj, 11. – 14. Septembar** 2 učesnika iz ALF BiH); „3.S. for Intercultural Citizenship Education” (**Tangier, Maroko, 2. – 8. Avgust** 2 učesnika iz ALF BiH, **Mazara del vallo, Italija, 17 - 23 Avgust** 4 učesnika iz ALF BiH, **Bursa, Turska, 7 - 13 Septembar** 3 učesnika iz ALF BiH);
- Nastavak aktivnosti na partnerskom projektu „Crew from the hood – Messages from province“, sa partnerima iz Srbije (Forum građanske akcije – FORCA Požega) i Crne Gore (NGO Fenomeni Kolašin).
- Zasluženi godišnji odmori

## Molba za podršku:

Dragi prijatelji,

Mjesečni informativni bilten Omladinske Mreže u Bosni i Hercegovini izlazi konstantno već 18 punih godina (od 1999. godine) Bilten se uređuje, dizajnira, prevodi na engleski jezik i distribuira na oko 10.000 e-mail adresa u BiH, Evropi i svijetu. U njemu prenosimo informacije o aktivnostima omladinskih organizacija iz BiH. Te informacije dolaze do čitalaca širom svijeta (putem e-maila, fb grupa, web portala i stranica) i često su prenošene u drugim izvorima i medijima. Isto tako, u biltenu donosimo informacije interesantne za mlade u BiH (seminari, treninzi, volontiranje, prakse, pozivi za grantove, razmjene...) Bilten radimo potpuno volonterski (bez ikakvih nadoknada za uređivanje, prevođenje, dizajn ili distribuciju).

***Trenutno smo u situaciji da – nakon ovog izdanja – obustavimo izdavanje biltena, prije svega zbog nedostatka finansija. Bilo koja vrsta Vaše pomoći nam je svakako dobrodošla. Ukoliko se odlučite da nas simbolično finansijski podržite, i time nam pomognete u daljnjem izdavanju mjesečnog biltena, bićemo veoma zahvalni. Naši bankovni podaci su:***

**Omladinski resursni centar (ORC) Tuzla**  
Naziv banke: **UniCredit Bank d.d. Mostar**  
**Kardinala Stepinca bb, 88000 Mostar, BiH**

**Za uplate iz BIH, broj računa je: 3383002261768516**

**Za uplate iz inostranstva (euri)**

Bank Swift: **UNCRBA22**

Bank Account Number: **25005565101**

IBAN: **BA39 3383 0048 9030 9533**

# AKTIVNOSTI ČLANICA OMLADINSKE MREŽE BiH



PRONI Centar za omladinski razvoj

Ul. Mehmedagića 24, 76100 Brčko distrikt BiH

Tel./Fax: +387 49 217 695

E-mail: pronibrcko@teol.net

www.pronibrcko.ba

## RYCO Regionalna konferencija „RYCO – START“



PRONI Centar je prisustvovao regionalnoj konferenciji pod nazivom „RYCO – START“ koja je održana u Etno Selu „Stanišić“ kod Bijeljine. Konferencija je imala za cilj da predstavi RYCO program i poveže organizacije iz BiH, Srbije i Crne Gore u cilju pripreme za predstojeće pozive za projekte u okviru RYCO. Više informacija o RYCO: <http://www.roadtoryco.com/>

## Energetsko siromaštvo BiH



PRONI Centar za omladinski razvoj uključen je u projekat koji realizuje Centar za ekologiju i energiju, te smo dali doprinos izradi dokumenta o Energetskom siromaštvu, sa fokusom na nekoliko gradova od kojih je i Brčko distrikt BiH. U sklopu projektnih aktivnosti održani su i pripremni sastanci u Tuzli a planirano je održavanje i Okruglog stola na ovu temu u Brčkom u narednom periodu.

## Sporazum o saradnji između vlade i NVO



PRONI Centar je, 06.juna potpisao Sporazum o saradnji sa Vladom Brčko distrikta BiH, sa preko 60 drugih organizacija civilnog društva iz Brčkog. Više informacija o ovom procesu: <http://www.cbgi.ba/index.php/hidden-meni/157-sporazumom-o-saradnji-između-vlade-brcko-distrika-bih-i-nvo-do-bolje-saradnje>

## CAT – Citizens Against Terrorism



Kampanja: [www.facebook.com/catbih](http://www.facebook.com/catbih) je zvanično završena ali stranica i grupa mladih ljudi nastavljaju sa radom i plijene pažnju medija koji i dalje prate aktivnosti CAT grupe. U junu su informaciju o kampanji prenijeli Al Jazeera, Federalna TV i Voice of America. Nastavak kampanje je na jesen sa partnerima: Facebook.com i EdVenture partners.

## ALF Sastanak mreže BiH

PRONI Centar je učestvovao na godišnjem sastanku ALF Fondacije, Mreže BiH i sastanku Upravnog Odbora ALF Mreže BiH, koji su se održali u Tuzli početkom mjeseca. Na sastanku su prisustvovali predstavnici organizacija članica ALF Mreže BiH koji su, tokom rada, usvojili godišnji izvještaj o radu Glavne kancelarije te usvojili plan rada za naredni period kao i strateške pravce rada i razvoja mreže.

## Aktiv KULT 2017



Četiri člana PRONI Centra učestvuju u edukativno, rekreacionom kampu u Gradačcu koji se održava na jezeru Vidara u organizaciji KULT Gradačac i Vijeća Mladih Gradačac. Tema kampa je „Aktivizam mladih“.

## Sastanak mreže u sektoru upravljanja javnim financijama



PRONI Centar za omladinski razvoj je uključen u projekat koji realizuje Centar za zastupanje građanskih interesa u okviru CSSP programa te učestvovali na petom sastanku mreže gdje su predstavljena dostignuća u radu mreže i precizirani su planovi za nastavak rada.

## Interkulturalni projekat razmjene mladih BiH - Švicarska

PRONI Centar za omladinski razvoj u saradnji sa **Pestalozzi Children's Foundation** poziva mlade ljude koji su rođeni 2000. i 2001. godine da se prijave na prvi Interkulturalni Projekat Razmjene Mladih Bosna i Hercegovina – Švicarska, koja će se održati od 03.08.2017. do 17.08.2017.



Smještaj i treninzi za grupu od 40 mladih iz BiH će se realizovati u Pestalozzi Dječijem Selu, u mjestu Trogen (Švicarska). Više o Pestalozzi Dječijoj Fondaciji možete saznati [ovde](#).

Edukativni program za mlade sačinjavaju teme: Interkulturalna komunikacija, Prava djece i Antidiskriminacija, a obuku vode stručnjaci iz Pestalozzi Fondacije.

Grupu mladih ljudi iz BiH će pratiti 6 iskusnih omladinskih radnika iz PRONI Centra za omladinski razvoj, koji će cijelo vrijeme biti sa mladima u Švicarskoj.

Troškovi smještaja i hrane i dva fakultativna izleta u Švicarskoj su obezbjeđeni, a učesnici treba da snose dio troškova prevoza od Brčkog do Trogena i nazad u iznosu od 100,00 BAM. Prevoz do Trogena i nazad će biti realizovan autobusom visokoturističke klase.

Nakon dvije sedmice, koliko traje razmjena, učesnici će biti u prilici da realizuju mini projekte mladih u Brčko distriktu BiH na teme koje će obrađivati u Švicarskoj.

Ukoliko ste zainteresovani da učestvujete, popunite aplikacionu formu koja se nalazi ovde: [Aplikaciona forma](#).

Rok za prijavu je do 10.07.2017.

Za više informacija možete se obratiti na broj telefona/vibera 065758591 – Jasmin Jašarević ili na email: [info@proni.ba](mailto:info@proni.ba)

## Out Of The BoX International



PRONI Centar za omladinski razvoj je uključen u rad međunarodne organizacije za inovativnost i solidarnost te je, u Briselu na godišnjem sastanku eksperata predstavila rad PRONI Centra u domenu omladinskog rada i rada na razvoju zajednice. Više o Out Of The Box: <http://outofthebox-international.org/>

## Obrazovanje o ljudskim pravima – Prakse obrazovanja o ljudskim pravima sa i od mladih ljudi

PRONI Centar za omladinski razvoj Civis i Mreza omladinskih klubova Brčko distrikta BiH su uvršteni u publikaciji dobrih praksi iz oblasti obrazovanja mladih o ljudskim pravima na Evropskom nivou u publikaciji koju je izdalo Vijeće Europe. Publikacija dostupna: <http://www.coe.int/en/web/youth/-/human-rights-education-in-action->

Više o projektu: <https://www.facebook.com/Ja%C4%8Danje-kapaciteta-omladinskih-lideraki-za-ljudska-prava-285608981536742/>





## Institut za razvoj mladih KULT

Ul. 4. viteške brigade 34-36 BA, 71210 Ilidža, Sarajevo

E-mail: [kult@mladi.org](mailto:kult@mladi.org)

Tel.: +387 33 778 778; Fax: +387 33 778 779

Web: [www.mladi.org](http://www.mladi.org)

## U Tešnju održan Biznis forum „Rasterećenjem privrede do novih radnih mjesta

Institut za razvoj mladih KULT i Općina Tešanj organizovali su u Tešnju 29.juna 2017. godine Biznis forum „Rasterećenjem privrede do novih radnih mjesta“.

U okviru Foruma, o gorućim problemima u bh. privredi razgovarali su privrednici, predstavnici resornih institucija vlasti, stručnjaci iz oblasti ekonomije, poslovnog okruženja i zapošljavanja, te mladi poduzetnici.



Tokom Foruma se govorilo o teretima koji ograničavaju rast i razvoj privrede u BiH, poput poreza na dodanu vrijednost, a govorit će se i o budžetskim poticajima kojima vlast podržava privredu, ulogama vlasti u poticanju poslodavaca na zapošljavanje mladih, prednostima i manjkavostima postojećih programa aktivnih politika zapošljavanja dostupnih poslodavcima i nezaposlenima, kao i načinima podrške novim biznisima i samozapošljavanju.

Cilj je bio okupiti predstavnike vlasti, privrede i mlade ljude radi vođenja konstruktivnog dijaloga o pitanjima unapređenja poslovnog okruženja i prilika za zapošljavanje u cijeloj Bosni i Hercegovini.

Neki od učesnika Foruma bili su Dženan Kulović, ekonomski stručnjak/Ekonomski fakultet Univerziteta u Zenici, Ajka Baručić, ekonomska stručnjakinja u Institutu za razvoj mladih KULT, Edin Jabandžić, privrednik, Haris Smajlhodžić, vlasnik HIT Design-a, Nejra Neimarlija Roić ekonomska stručnjakinja u Institutu za razvoj mladih KULT.

Biznis forum „Rasterećenjem privrede do novih radnih mjesta“ organizovao je Institut za razvoj mladih KULT uz podršku Općine Tešanj, a u okviru inicijative "Poslovni prostor BH" koju vodi Institut za razvoj mladih KULT, a koja je dio Projekta održivosti civilnog društva u Bosni i Hercegovini (CSSP), koji realizuju Centri civilnih inicijativa (CCI) i Centar za promociju civilnog društva (CPCD), a koji je podržan od Američke agencije za međunarodni razvoj (USAID).

## Omladinski radnici učili o komunikacijskim vještinama

U junu je održan drugi modul Obuke za stručne saradnike za rad sa mladima. Tema modula bila je komunikacijske vještine, a polaznici/e savladali su vještine i tehnike komuniciranja koje će im olakšati prvenstveno rad sa mladima, ali i drugim ciljnim grupama.

Komuniciranje kao dio svakodnevnih aktivnosti omladinskih radnika ne podrazumijeva samo prenošenje informacija, i eventualnu povratnu informaciju. Omladinski radnici trebaju imati izgrađene kapacitete, senzibilitet i empatiju, odnosno profilirane vještine, kako bi mladima pristupili na dobar, iskren i produktivan način.

*Divan je osjećaj biti i raditi na jednom mjestu sa toliko različitih ljudi koji dolaze iz cijele BiH, a svi imamo zajednički cilj: unaprijediti vještine rada sa mladima. Zajedničkim snagama dolazimo do najvažnijih zaključaka.” – poručila je Azra Halilović, jedna od polaznica obuke.*

Polaznici/e imali su priliku o mladima razgovarati i sa ambasadorom Kraljevine Švedske u BiH **Andersom Hagelbergom**.

Obuku pohađaju 24 polaznika/ce iz 18 gradova iz Bosne i Hercegovine.





## OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: [svitac@gmail.net](mailto:svitac@gmail.net)

Web: [www.svitac.org](http://www.svitac.org)

FB: [www.facebook.com/omladinska.svitac](https://www.facebook.com/omladinska.svitac)

## Dnevne radionice



Omladinska organizacija Svitac je u junu nastavila sa svakodnevnim aktivnostima. Učesnici su podijeljeni u dvije grupe, uzrast 4-7 godina svakim danom od 11:00-13:00, a uzrast 8+ od 14:00-15:30 časova. Koordinatorica jutarnjih radionica je pripremila plan aktivnosti za neformalno učenje kroz igru, maštovitost i kreativnost. U toku mjeseca ponedjeljkom i utorkom su se organizovale kreativne radionice, a srijedom su slušali i vježbali razne dječije pjesmice namijenjene njihovom uzrastu, kako bi na taj način vježbali ritmiku i polako usvajali tekst. Četvrtkom su radionice bojenja i pisanja brojeva uz pomoć radnih listova za bojenje, takođe ponavljanje

oblika i boja na engleskom i njemačkom jeziku. Materijali koji su se koristili za realizaciju ovih radionica su ljepilo, žica, kolaž papir, blokovi za crtanje, voštane boje, flomasteri, drvene i vodene bojice, kamenje, listovi, grane. Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, takođe da razviju motoriku i poštovanje prema drugom i usvoje lijepo ponašanje. U junu je do 20 učesnika pohađalo jutarnje dnevne radionice.

Poslepodnevna grupa (8+) je u junu radila na dekorativnim temama, koje su bile prilagođene njihovom uzrastu. Uz pomoć lokalnih i međunarodnih volontera radili su na mini projektima "Hrana iz cijelog svijeta i Mini kuće". Sve aktivnosti su održane po rasporedu, ponedjeljkom - radionice kreativnog izražavanja, utorkom engleski jezik, komunikacija, izgovor, te razne igre koje pospješuju učenje stranog jezika u grupi. Grupa je pored gramatičkih zadataka vježbala komunikaciju na engleskom jeziku. Srijeda je dan za ples, muziku i pjevanje. Svakog četvrtka starija grupa je podijeljena u dvije manje i učesnici imaju mogućnost da se okušaju u društvenim igrama i timskom radu, razvijajući osjećaj za poštovanje drugog, socijalizaciju i fer igru. Petkom su radionice njemačkog jezika kao i dan za pomaganje u izradi domaće zadaće.

Radionice se održavaju u Omladinskom centru Brčko distrikta. Koordinator radionica u junu je bila Milica Baćanov uz asistenciju lokalnih i Weltwaerts i EVS međunarodnih volontera Alexandra Likica iz Njemačke, Mahmuta Taha Bicera i Yunusa Seckina iz Turske, Terlyn Noiles iz Kanade, Andree Diaz is SAD-a, te Eleonore Pearson i Bena Owensa iz Velike Britanije. Broj učesnika starije grupe je trenutno između 15 i 20 učesnika.

## „Pričajmo njemački“ – radionice komunikacije na njemačkom jeziku sa izvornim govornicima

Radionice njemačkog jezika se održavaju svakog četvrtka u prostorijama Omladinskog centra Brčko distrikt od 17:30-19:30 časova.

I ovaj mjesec je grupa radila na komunikaciji i temama svakodnevnice (restoran, kino, kafe). Grupa je također radila vježbanje slušanja, te pisanje i čitanje. Radionice komunikacije na njemačkom jeziku su namijenjene za sve koji žele naučiti osnove gramatike, ali i usavršiti već postojeće znanje i steći nova iskustva i poznanstva. Koordinator projekta je međunarodni volonter iz Njemačke Alexander Likic. Radionice pohađa 10 učesnika (dvije grupe).



## „I love English“ – radionice komunikacije na engleskom jeziku sa izvornim govornicima

Radionice engleskog jezika se održavaju svake srijede u prostorijama Omladinskog centra Brčko distrikt od 19:00-20:00 časova. Radionice komunikacije na engleskom jeziku su namijenjene svima koji žele naučiti osnove gramatike, upotrebu svakodnevnih fraza i drugih elemenata, ali i usavršiti već postojeće znanje i steći nova iskustva i poznanstva. Ovaj mjesec je koordinator radionica nastavio vježbanje komunikacije kroz rad u parovima. Koordinator projekta je međunarodni volonter iz Velike Britanije Ben Owens. Radionice pohađa 10 učesnika.

## „Učimo Turski“ – radionice komunikacije na turskom jeziku sa izvornim govornicima

Radionice turskog jezika se održavaju utorkom u prostorijama Omladinskog centra Brčko distrikt od 18:00-19:00 časova. Radionice komunikacije na turskom jeziku su namijenjene za sve koji žele naučiti osnove gramatike, upotrebu svakodnevnih fraza i drugih elemenata, ali i usavršiti već postojeće znanje i steći nova iskustva i poznanstva. Učesnici su ovaj mjesec vježbali svakodnevnice, jednostavne dijaloge. Koordinator projekta su međunarodni volonteri iz Turske Yunus Seckin i Mahmut Taha Bicer. U junu je bilo prisutno do 10 učesnika.

## Dramske radionice

Projekat „Dramske radionice“ za mlade ljude se održava svakog utorka u prostorijama Omladinskog centra Brčko distrikt od 20:00-21:30 časova, a koordinator projekta je lokalna volonterka Azra Pezerović. Grupa trenutno vježba na scenama iz komedije „Bitange i princeze“. Glavni cilj ovog projekta je da mladi ljudi, koji vole pozorište i glumu, usvoje nove vještine, te da steknu nova iskustva i poznanstva

Prije čitanja tekstova, grupa radi vježbe zagrijavanja u trajanju od 10 do 20 minuta. Ove vježbe su od velike pomoći za opuštanje prije aktuelne realizacije radionice. Dramske radionice je u junu pohađalo 10 učesnika, uzrasta 16+.

## „Love Art?“ – radionice kreativnog izražavanja za uzrast 16+

Radionice kreativnog izražavanja se održavaju svakog utorka u prostorijama Omladinskog centra Brčko distrikt od 19:00-20:30 časova. Ove radionice su namijenjene za sve koji vole umjetnost i istoriju umjetnosti, te crtanje, slikanje i druženje uz diskusiju. Koordinator projekta je međunarodna volonterka iz Velike Britanije, Eleonore Pearson. Radionice je u junu pohađalo 5 učesnika.

## „Freeletics“ – sportske radionice

Sportske radionice se održavaju utorkom i četvrtkom od 21:00-22:00 časova u prostorijama Omladinskog centra Brčko distrikt i namijenjene su mladim ljudima koji žele da poboljšaju motoriku, kondiciju i tjelesnu snagu, te da steknu nove vještine i poznanstva. Koordinator vježbi za kondiciju i motoriku je međunarodni volonter iz Njemačke Alexander Likic.

## Radionice gitare

Učesnici radionica gitare u junu su nastavili sa redovnim radom uvježbavajući etide, skale i duete.

## Radionice sambe



Učesnici ovih radionica nastavili su rad na kompozicijama Ragga, Hedge Hog i Van Harte Pardon uvježbavajući kontinuirano sviranje istih bez pauze između, uključujući improvizaciju i varijacije u sklopu navedenih kompozicija.

## Sporazum o saradnji sa Vladom Brčko Distrikta BiH

Omladinska organizacija Svitac je 06. 06. 2017. godine potpisala sporazum o saradnji između Vlade Brčko distrikta i nevladinih organizacija.

Sporazumi su potpisani sa više od 50 nevladinih organizacija sa područja Brčko distrikta koje žele sarađivati sa Vladom Brčko distrikta BiH na izgradnji prosperitetnog društva i unapređenju kvaliteta života svih građana distrikta Brčko.

Ceremonija svečanog potpisivanja je održana u sali hotela „Jelena“ u Brčkom.



## Radionica sa fokus grupom

Radionica sa fokus grupom (uzrast 16-18 godina) je održana 07.06. u Omladinskom centru Brčko distrikt, kako bi dobili uvid u probleme i potrebe mladih osoba u našoj lokalnoj zajednici. Radionici su takođe prisustvovali članovi Lokalnog tima ASuBIH Brčko. Radionica je bila veoma produktivna, te je dala za početak uvid u problematiku mladih, kao što su nezaposlenost u struci, neinformisanost mladih, nedovoljno praktične nastave itd. Kako je ova problematika opširna, planiran je nastavak ovih radionica.



Za jul se planira nastavak svih redovnih radionica Omladinske organizacije Svitac.



# SAOPŠTENJA / INFORMACIJE / DONATORI / POZIVI

## YES Program za mlade



SOS PROGRAM ZA MLADE YES CENTAR TUZLA | 2017 - 2019

Ne možeš dobiti posao sa diplomom koju imaš? Tvoje stečeno znanje nije dovoljno? Želiš naučiti nešto novo, prekvalificirati se, a nemaš novac za to?

Organizacija SOS Dječija sela BiH pruža priliku onima koji je inače nemaju!

Pokrenut je novi program za mlade, **YES program**, kojim se želi doprinijeti adekvatnom zapošljavanju mladih kroz poboljšanje opšte socio-ekonomske situacije marginaliziranih mladih u BiH (mladi iz rizičnih skupina, mladi bez roditelja, sa nižom ekonomskom situacijom, mladi iz ruralnih mjesta).

U tri godine trajanja programa, za 180 mladih, biće organizovane obuke, doobuke, prekvalifikacije, treninzi, seminari, kako bi mladi uspjeli da se prekvalifikuju ili dobiju priliku da pored srednje škole ili fakulteta, nauče nešto novo, drugačije, i na taj način sutra dođu do posla i budu kompetetniji na tržištu rada.

Prvo će biti održan **Modul - Basic trening, 16 radionica po 3h**, gdje će svi mladi koji budu primljeni, proći osnove: životne i društvene vještine; kako upravljati svojim vremenom; planiranje/organizovanje i omladinski aktivizam i volonterizam.

Nakon toga mladi će imati priliku da pohađaju kurs, seminar, školu, pripravnički, volonterski angažman, a oni najbolji mogu dobiti ostvarenje nekog svog privatnog biznisa, ili zaposlenje.

Za više informacija i prijavu javi se na:

### SUŠIĆ SENADA

Projekt Koordinator informacionog sistema  
ekonomskog jačanja mladih

Program SOS Dječije selo Gračanica  
YES Program Tuzla

Skendera Kulenovića 23

75000 Tuzla

Bosna i Hercegovina

Mob + 387 65 346 088

[senada.susic@sos-ds.ba](mailto:senada.susic@sos-ds.ba)

[www.sos-ds.ba](http://www.sos-ds.ba)

## KONKURS

Konkurs/natječaj za izbor korisnika sredstava Fondacije za muzičke, scenske i likovne umjetnosti za 2017. godinu

Predmet Konkursa/Natječaja je prikupljanje prijava i izbor korisnika sredstava Fondacije za muzičke, scenske i likovne umjetnosti (u daljem tekstu: Fondacija) za 2017. godinu.

### OBLASTI U OKVIRU KOJIH ĆE SE VRŠITI IZBOR KORISNIKA SREDSTAVA

1. Projekti, programi i manifestacije muzičke umjetnosti od značaja za Bosnu i Hercegovinu i Federaciju Bosne i Hercegovine

2. Projekti, programi i manifestacije scenske umjetnosti od značaja za Bosnu i Hercegovinu i Federaciju Bosne i Hercegovine
3. Projekti, programi i manifestacije likovne umjetnosti od značaja za Bosnu i Hercegovinu i Federaciju Bosne i Hercegovine
4. Otkup likovnih umjetničkih djela
5. Drugi oblici sufinansiranja iz oblasti muzičkih, scenskih i likovnih umjetnosti

#### **KRITERIJI ZA IZBOR KORISNIKA**

1. Procjena estetskih i tematskih vrijednosti prijavljenog projekta. Kod estetsko-tematskog kriterija procjenjivat će se sljedeće:

- Cilj projekta značajno doprinosi razvoju muzičkih, scenskih ili likovnih umjetnosti u BiH, odnosno FBiH
  - Projekt ima potvrđen status i značaj
  - Projektom se stvaraju visoke estetske vrijednosti iz oblasti muzičke, scenske ili likovne umjetnosti od značaja za Bosnu i Hercegovinu kojima se bosanskohercegovačku kulturu stavlja u evropski okvir
  - Projektom se potiče i obogaćuje stvaralaštvo bosanskohercegovačkih autora usvim muzičkim, scenskim ili likovnim oblicima i vrstama
  - Projektom se promovira bosanskohercegovačka kultura i umjetnici na poljuresionalne i međudržavne suradnje
  - Projektom se potiče razmjena (gostovanje, koprodukcije) umjetnički vrijednih i kvalitetnih produkcija u području muzičkih, scenskih ili likovnih umjetnosti
  - Projekt nudi inovativni pristup.
2. Procjena društvene i kulturološke opravdanosti projekta u Federaciji Bosne i Hercegovine. Kod društveno-kulturološkog kriterija procjenjivat će se sljedeće:
- Projekt svojim kontinuitetom promovira kulturni identitet sredine iz koje dolazi
  - Projektom se promovira kvalitetna i nova inicijativa za određenu sredinu
  - Projektom se doprinosi promociji i afirmaciji bosanskohercegovačke kulture i kulturnih identiteta
  - Projektom se doprinosi ravnomjernoj regionalnoj i nacionalnoj zastupljenosti
  - Projektom se promoviraju tradicija i kultura naroda u Bosni i Hercegovini na poljumu muzičke, scenske ili likovne umjetnosti
  - Postoji interes kulturne javnosti za izvedbom projekta
  - Postoji potpora projektu od strane lokalne zajednice
  - Projektom je obuhvaćen veći broj sudionika, izravnih i neizravnih korisnika te širina prostora djelovanja.

2. Procjena finansijskih i operativnih kapaciteta predlagača projekta za provedbu projekta. Kod finansijsko-operativnog kriterija procjenjivat će se sljedeće:

- Predlagač projekta ima sposobnost, kapacitet i stručnost za upravljanje predloženim projektom (uključujući osoblje, opremu, upravljanje proračunima)
- Očekivani troškovi projekta usklađeni su sa očekivanim tržišnim vrijednostima usluga
- Projekt ima funkcionalnu i ekonomsku opravdanost
- Projekt je profiliran u odnosu na osnovnu djelatnost organizatora odnosno predlagača
- Postoji osigurano sufinansiranje projekta.

Maksimalan iznos koji se može dodijeliti za projekte, programe i manifestacije je 25.000,00 KM po projektu, programu i manifestaciji.

ROK ZA DOSTAVLJANJE PRIJAVA JE 42 DANA OD DANA OBJAVLJIVANJA, ODNOSNO ZAKLJUČNO SA 4.8.2017. GODINE, REZULTATI KONKURSA/NATJEČAJA SU 60 DANA PO ZATVARANJU KONKURSA/NATJEČAJA.

Kompletan poziv:

[http://fmslu.ba/images/stories/dokumenti/2017/Tekst\\_Konkursa\\_MSL\\_2017.pdf](http://fmslu.ba/images/stories/dokumenti/2017/Tekst_Konkursa_MSL_2017.pdf)

## NATJEČAJ

Otvoren je natječaj za prijavu radova na West Herzegovina Fest No.15. koji će se održati od 3. do 5.8.2017. godine u Širokom Brijegu.



Objavljujemo natječaj za prijave radova na West Herzegovina Fest No.15. koji će se održati u Širokom Brijegu od 3. do 5.8.2017. godine. Kao i dosadašnjih godina program festivala će činiti upravo Vaše prijave, uz nastupe specijalnih glazbenih gostiju (prošlih godina to su bili Zabranjeno Pušenje, Natali Dizdar, Vatra, Pavel, Silente, Edo Maajka, Hladno Pivo, Sars, Goran Bare & Majke, Letu Štuke, Damir Urban, Neno Belan, Gustafi, Kino Klub, Kawasaki 3p, TBF, JINX, Belfast Food, Dubioza Kolektiv, Elemental, Kries, Zoster...).

Autori kratkih priča natječu se za novčanu nagradu od 1.000,00 KM (500,00 eura), autori filmova natječu se za novčanu nagradu od 1.000,00 KM (500,00 eura), a nagrada za glazbeni dio festivala je snimanje pjesme i snimanje spota.

Na festivalu možete sudjelovati ako se prijavite najkasnije do 10.7.2017. godine.

Dodatne informacije o načinu apliciranja možete pronaći [ovdje](#).

Izvor : <https://www.hocu.ba/index.php/hocu.priliku/otvoren-natjecaj-za-prijavu-radova-na-west-herzegowina-fest-no-15/>

## Kampanja za potpisivanje peticije za izgradnju Koncertne dvorane Sarajevo

Pozivamo stručnu javnost, sve građane i prijatelje Sarajeva i Bosne i Hercegovine da podrže svojim potpisima kampanju za izgradnju Koncertne dvorane Sarajevo na Marindvoru, prema predviđenom regulacionom planu i programima razvoja Sarajeva i Kantona Sarajevo. Riječ je o neopravdanom zapostavljenom projektu koji su, međunarodnim ugovorom, putem svjetskog konkursa, pripremili 1998. godine Kanton Sarajevo i Grad Rim.

Projekat je izabrao žiri na čelu sa najslavnijom svjetskom arhitekticom **Zahom Hadid**, uz učešće bosanskohercegovačkih arhitekata **Nedžada Kurte i Saida Jamakovića** i predstavnika svjetskih asocijacija arhitekata.

Projekat je predstavljen na brojnim svjetskim sajmovima arhitekture (Venecija, itd) i publikovan u stručnim časopisima i knjigama. Smatra se jednim od najboljih projekata nove generacije.

**Pozivamo vas i vaše članove da se pridružite ovoj kampanji i potpišete ovu peticiju.**

Više o ovoj kampanji, kao i mjesto gdje možete da potpisete peticiju je:

[https://www.onlinepeticija.com/concert\\_hall\\_sarajevo\\_campaign\\_kampanja\\_za\\_koncert\\_hol](https://www.onlinepeticija.com/concert_hall_sarajevo_campaign_kampanja_za_koncert_hol)

## STIPENDIJE

Stipendije za prirodne i tehnološke nauke u Sloveniji

**Slovenački fond za ljudske resurse poziva mlade studente da apliciraju za stipendije koje se odnose na prirodne i tehnološke nauke.**

Prednost imaju studenti koji dolaze iz zemalja sa Zapadnog Balkana. Stipendija iznosi 8.400 eura.

Potrebno je da kandidat popuni aplikacioni formular i dostavi svu potrebnu dokumentaciju.

Prijave se šalju do 6. oktobra 2017. godine.

Više informacija na: <http://www.sklad-kadri.si/en>.

Izvor: <http://mladiinfo.me/stipendije-za-prirodne-i-tehnoloske-nauke-u-sloveniji/>

## RTVFBiH traži novinar/ke, reportere/ke i voditelje/ice

Radio-televizija Federacije BiH vas poziva da se javite na audiciju za novinare/ke, reportere/ke i voditelje/ice Radio-televizije Federacije, koja će se održati **od 17. do 21.7.2017.godine**.

Uz visoku stručnu spremu fakulteta društvenih smjerova, poželjno je da ste komunikativni, radoznali, uporni, te spremni za timski rad.

U sklopu audicije, nakon kratkog upoznavanja, biće obavljen audio-vizuelni test (studijsko snimanje), te usmeni test informisanosti o političkim, ekonomskim, kulturnim i drugim društvenim zbivanjima u zemlji i svijetu.

Audicija će biti održana od 17. do 20.7.2017.godine u Sarajevu, RTV dom, Bulevar Meše Selimovića 12, a u petak, 21.7.2017.godine u Mostaru, Informativno-tehnički centar BHT-a i FTV-a, ulica Krpićeva 3.

Svoju prijavu sa ličnim podacima (ime i prezime, datum rođenja, stručna sprema, eventualno radno iskustvo u medijima, te kratak opis ličnih karakteristika i interesovanja) i fotografijom možete dostaviti na e-mail adresu: [programftv@rtvfbih.ba](mailto:programftv@rtvfbih.ba) do **12.7.2017**.

Izvor: <https://www.hocu.ba/index.php/hocu.priliku/rtvfbih-trazi-novinarke-reportereke-i-voditeljice/>

## Green Factor Design takmičenje

**Organizacija "Infiniti" poziva profesionalne dizajnere i studente iz čitavog svijeta, do 35 godina starosti da se prijave za učešće na petom Green Factor Design takmičenju.**

U skladu sa svojom politikom promovisanja održivosti, Infiniti od učesnika ovaj put očekuje izradu predmeta napravljenih u potpunosti od drveta, eko-održivih i reciklažnih (stolica i sto, npr)

Projekti moraju minimalizirati ili ukoliko je moguće eliminisati upotrebu alternativnih elemenata kao što su metalni dodaci, te moraju smanjiti gubitak materijala i prostora.



Dobitnik će biti proglašen u septembru 2017. Novčani iznos nagrade je 5,000 euvra, a postoji i mogućnost da se pobjednički projekat stavi u proizvodnju.

Prijave slati do 31. jula.

Više informacija na: <http://www.infiniteidesign.it/en/contest/>



## Dragi prijatelji,

*Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.*

*Rok za dostavljanje informacija za svako naredno izdanje je 30-ti u mjesecu.*

*Adrese za slanje vaših informacija za mjesečni bilten:*

**Omladinski resursni centar Tuzla  
Hadži Bakirbega Tuzlića 1  
75000 Tuzla  
tel/fax: 035 258 077  
e-mail: [orcuzla@bih.net.ba](mailto:orcuzla@bih.net.ba)  
[hcatuzla@bih.net.ba](mailto:hcatuzla@bih.net.ba)**

*Mjesečni bilten uređuje  
Omladinski resursni centar -  
ORC Tuzla*

*Prevod Biltena na engleski: **Stefan Cvijanović** – prof. engleskog jezika*

*WEB stranica Mreže:  
[www.omladina-bih.net](http://www.omladina-bih.net)*

*Mejling lista Mreže:  
[posta@omladina-bih.net](mailto:posta@omladina-bih.net)*

*Webmaster:  
[emir.delalic@gmail.com](mailto:emir.delalic@gmail.com)*